

太

函

集

太函集卷之二十三

新都汪道昆伯玉著

序十二首

山西鄉試錄序

在令甲諸鄉國三歲論士則錄其人文之入彀者籍  
奏之 上紀萬曆之七年巡按山西監察御史某在  
事夙夜懔懔務操精白爲百執事先提調則屬某某  
監試則屬某某會先御史某遣聘諸文學自四方至  
則以某主考試某同考試闡以內外陳力藏事惟其  
人乃合巡按宣大御史某提學副使其選士千百有

奇三試之得雋六十五人文二十首將籍以獻自惟  
豎儒駑下猥辱任使竊附于以人事君以故不避不  
馴首宣言以諗多士頃自 皇上初受曆數有司首  
舉賓興觀人文而化成蓋於茲三舉矣比年布功令  
廣厲視學諸臣直將洗舊染而一新之申令不啻三  
五其首舉也士若在蟄而昭蘇趯趯思奮再舉則毛  
羽旣具躍然而知嚮方乃今三舉若起溟滓挾扶搖  
蓬蓬然天飛矣夫樹人如樹穀必得其時雖有污萊  
不廢穗蓁中歲而穰三歲而登三歲而升而平又三  
歲而太平矣山西古冀州地堯舜禹之所更都當堯

之時封可比屋三聖相授野無遺賢其分職爲四岳  
爲十二牧爲九官其類族爲十六相其亮天工也爲  
二十有二人其裒然而首百官則得五臣而天下治  
矣其後千有餘歲唐叔始以晉封歷世阜昌文公始  
伯帥諸侯以獎王室世主齊盟乃若股肱之良則九  
宗五正咸在始于狐偃趙衰迄于叔向寔蕃有材尊  
主庇民視一匡爲尤烈後儒閭於大較直將以陪隸  
卑視之善謀國者將爲異代求材慨九原不可復作  
幸而借一國將有瘳如使資適逢時得聞孔子之道  
其所就業不亦警乎大哉要以表裏山河林林然皆

晉產也上之帝則帝臣王則王佐下之而伯不失世卿其斯爲九州之上腴其賦上上則自昔然矣其後千有餘歲觀明德而服西成都人士應感而興無異唐虞之際薛文清以躬行著皦然不緇列祀瞽宗於當世無兩邇者起家仕國往往具文武材宰執師保之臣踵相接也先是虜爲邊患士靡寧居頻年納貢欵關願爲臣妾以故邊人不聳邑絃誦而戶詩書非藉皇靈宜不及此縣官方作人以待舉至於再至於三經沃土而授上農庶幾得邁種者其人爲秋之實矣顧賓興之典昉於成周由前則揖讓而未遑

由後則師武臣力而不急於時士烝烝而利嚮用無庸鄉舉而里選之自漢設科周制未改乃若漢霍宣成唐狄梁國裴晉國宋司馬溫國文潞國之數臣者率皆有待而興然或曠千古而一鳴曠百世而一覲方諸疇昔宜若徑庭今制特詳於周官而多士咸誦法乎孔子概其所舉視三代之英何讓焉藉令桀者不鑿而夷稗先登諄矣以此而讓樹穀者將安所追簿責哉及縱觀多士所爲文斐然較著莫不竭心思而中典要窮經術而達時宜卽其緒餘亦皆援古而準今尊王而賤伯此故都之流風遺俗誦法之成

效而振德之明徵也幸而得士若此舉者庶無罪悔  
矣乎旣卒業而深惟中心之縣未解也古者以鄉三  
物爲教則德爲上行爲先借曰藝成於斯爲下及其  
以鄉射而賓多士規規乎程一藝而衡石之射義有  
言此可以觀德行彼其逢萌鴻超甘蠅飛衛紀昌之  
屬其德行寧有足多者邪何以得當君子觀也今多  
士不以射角而以言揚射之中侯宜莫如言之中窾  
也君子言必顧行故有德者必有言用是而觀其於  
德行爲近第帝堯在位比屋可封而靜言庸違四岳  
咸薦聽其言而信其行所不爲蕘稗也者幾希抑或

懲其不然惟其言而莫之信則臯陶贊贊厥有昌言  
雖在百揆聞言則拜有嘉於是乎罔攸伏矣如是乎  
言之不可已也無寧以一廢百乎哉昔者晉獻嘉禾  
史書諸策惟是爲王者之瑞而大鹵之金垂棘之璧  
汾之鼎不與焉晉之乘可攷也爾多士以昌言進則  
爲嘉禾由此而薦馨香有司庶可藉手否則違言而  
爲萑稂豈惟爾多士之羞其在詩曰先民是程多士  
勉矣是役也云云法得書

五嶽山人後集序

歲戊午不佞以楚守吏預楚賓興幸得徧觀楚材乃



大奇玉叔是猶沿江漢而泝岷嶓津津乎成博士一家言及玉叔對公車守理無害出爲二千石守淮陽居常脩古屬辭積若干卷不佞受而卒業泱泱乎成作者一家言是猶沿淮海而泝龍門卽太史遷可旦暮遇也旣玉叔進憲大夫奉功令入蜀進藩大夫奉璽書治漕六傳之所周覽置驛之所交游庶幾乎窮西南之奇盡東南之美矣故其所就業日益富而其所治業日益精合而筴之命曰後集不佞三仕楚習楚之良上下數千百年不啻式其閭而持其臂矣楚控南紀當離明其人幼清則鸞熊博雅則左史倚相奇

詭則漆園吏忠憤則三閭大夫靡麗則宋玉景差閔  
衍則蘭陵令其言皆足以不朽惡論張楚乎哉由今  
而談或繫方國或隣阨窮憤者過激而自傷詭者洗  
洋而自恣靡麗者無當閔行者不經概諸中庸則瑕  
瑜辨矣 明興楚士爲盛豐鎬近在郢中乃若夢澤  
鄂渚二卿則其彰彰者也顧直卿任放不避昌被明  
卿負俗獨行終亦不免則其論著可得而言夢澤操  
咫尺爲名高此以三戶復楚者也鄂渚未知所稅駕  
果能過三百乘乎其未邪要以蓬累明時其爲不得  
均也玉叔爲吾同舍郎子蓋世其家而玉叔負雋才

且蚤貴當世方急王叔不啻楚國之急叔敖蓋得時而駕康莊莫之擁闕其言忠而不憤奇而不詭不靡而麗不衍而閎乃今就業日益富治業日益精瞠乎百世之後而左右之矣舊史氏有言詩書隱約欲遂其志者之思也信斯言也作者必窮而工如其困而哀思孰若政和而安以樂如其不平而感憤孰若心和氣和而天地之和應之故誓命訓誥不賢於典謨采詩而觀列國之風則周南召南首矣楚之駕者不亦魚麗乎哉乃王叔以左廣先則其所遇者殊也且也由前則始駕也由後則再駕也王叔春秋富矣于

今爲後于後爲今超乘而上之三駕而楚士莫敢與爭矣玉叔名氏具前集元美序中

新都考卷序

太守公故起楚業已盡得楚材旣從宦東游則又盡浙東西士益爲令以校士應內史聘盡南國之良入爲尚書郎諸郡國所登公車所召咸待命大宗伯公以諸郎在事其視眈眈自甲至丁庶幾盡天下士旣由南宮出守吾郡將合七校之士而試之前爲期適兩雪甚公遞進遞試都人士不續而溫始事事輒謝諸相君諸令君以下各歸視事有常挾日而竣輒檄

所司第名而進故事蒞時試猶尸唐肆不徑實則多  
門未發篋書市人蚤已籍姓名高下公爲之一洗篋  
未發閱而無聞旣發無不當人人心都人士乃大服  
公挾筴而示不佞嚶然以得士足多不佞謝曰新都  
阻一隅鄙南國都人士守其戶說難語通方君侯以  
雄風倡之所不如衆籟者非夫也顧君侯閱士多矣  
其何以熒其目望其腹乎公曰否否世所稱天下士  
則吳越先鳴東吳之士多奇奇或不法東越法矣率  
相因無他奇兩弃所短兩集所長是爲難耳都人士  
猶之乎諸生也寧詎輒以天下士命之至其師心爲

奇恒自內於繩墨抑或師古爲法又將自外於牝牡  
驪黃藉令成一家言一鳴驚人矣諸筴具在願就而  
徵焉不佞曰幸哉謹受卒業不佞蓋嘗聞之矣入其  
國而教可知公故以易鳴此易教也語曰易奇而法  
治經藝者此其原乎都人士觸類而通之嚮風而胥  
化夫何有不法夫何有不奇及其成功其斯爲天下  
士也李令君聞之曰善琯不敏無能爲公役幸得以  
學易從下風亟屬梓人籍是筴以布境內

春秋左傳節文引

作者之謂聖非聖不經夫聖孔子不居猥云不作於

時王迹熄矣則曰吾志在春秋春秋王者事也抑亦聖者事也故位在則禮樂征伐道在則經士無當於道而齒聖經是無將也說春秋莫良於左氏夫非聖人之徒與其時紛爭其人倬詭其辭葆大其事奇褒比事屬辭燦然不倍於道猶之百揆三事奉天子之禮樂征伐以紀四方謂之素臣有以也後有作者宜居亞旅之間近世桃之而躋康侯知管晏而已矣不佞誦法左氏亦既有年年始及衰不遑卒業乃撮居常所膾炙者省爲節文蓋存者五之三哀者二大較以經統傳故惟因傳引經義取斷章卽離經勿恤矣三體

則取諸真氏諸品則倣畫史以爲差其法則不佞竊  
取之其間往往概見觀者謂是舉也猶旅幣之有特  
達也戎行之有選鋒也故登簡壁則庭實下陳建前  
茅則五兵受命藉第令取節其誰曰不宜不佞瞿然  
曰嘻此時過力詘者之爲殆不任而分重者耳有全  
力者務舉其贏不則將以是爲朝三不佞過矣

碣石宮新草引

作者卑訛世儒胡爲襲拘攣而沿蹇淺要其義則性  
與天道其辭則古昔先王作者雖奇其孰能弗畔曉  
曉然自以爲奇勝不亦左乎當世設科率由經藝結



萬夫而乘一徑何技不單猥云歲至而後工卽白首  
不舍夫鬻項皆孺子褻然爲聖者師平津六十成名  
卒負洛陽年少槩諸天授安論齒哉未也燕工函粵  
工罽則以其方箕爲弓裘爲冶則以其世三者集而  
大業成矣上都古燕地也碣石宮在焉歲庚辰龍相  
君與計偕詣闕下就而講業待詔南宮上以  
士習駸駸不經其辭滋蔓篇爲之制毋浮五百言聞  
者若跪六馬而御三周一旦改步鮮不跼蹐相君灑  
然更始奉明詔而首應之草書義二十有二篇辭  
不煩而義具足猶之泰豆循塗執轡畢中鑒和由是

籍上公車其年始冠都人士以爲天授方之賈生且也揆其方則楚材論其世則濟美集此三者故全也旣以司理相吾郡日進多士而術省之嘗發策授潘兩生則都市新草也黃文學寓宇下少以進士起家退語兩生改轅之範在是矣亟版之以徇吾黨咸與維新兩生謂余不以好古而廢博士家言願建前茅以先左廣余幸而卒業掩卷而長太息者三竊惟草木昆蟲物而不化鵲鴝螟蛉鷹鳩鴛鼠化而不神極而言之靈莫如麟鳳偕曰希有不能不囿於形今夫龍其化無方其神不測大之則摩九天彌六合小之

則爲尺蠖爲泥蟠投之溟渤而不以爲舒內之蹄涔而不以爲縮屈信互用鉅細互藏相君去故而卽新則其族也昔居燕有談天者其言漫衍無歸藉令受繩尺於般倖彼且批頰退矣

### 醫方攷引

今之業醫者則吾郡良吾郡貴醫如貴儒其良者率由儒徙業吳山甫故儒生也則亦降儒而就醫其言曰儒者上治經術下治百家於是乎始有成業醫家上軒岐而下四氏宜亦如之業者紛如率未及一呖而求六律抑或操禁方爲口實無庸剽竊陳言甚者

託言師心倍古昔而自用詩之詩者也與其自用無  
寧有方與其執方無寧窮理軒岐尚矣四氏各名其  
家始吾求之軒岐什或得一繼求之四氏什或得三  
冒然心語曰道在是矣方何爲者彼或以方爲政我  
不敢知卒之要其指而揆其方夫各有當是故君臣  
佐使異用寒熱虛實異齊多寡輕重遲速異宜亢承  
異制譬之經義道在於經方其義也譬之陳兵主  
於帥方其陳也夫誦經義以爲筌蹄飾行陳以爲綴  
繞則其末節顧論士者非經義不章卽戎者非行陳  
不能用衆皆是物也崑旣爲醫方攷六卷願就有道

而正焉嗟乎不佞故以儒發家以武徇國是兩者皆  
弁髦也吾無所用之不佞方事大醫王有意乎西極  
其言芥二儀而秕千聖大有徑庭要諸剝塵則萬方  
畢矣沿則析不二而爲大千泝則匪大千而爲不二  
軒岐四氏則不二之云其方則大千也卽析而大千  
居然不二具在能者得之耳昔人有言不爲良相則  
爲良醫又曰用藥如將吾觀吳子之挾筴則兩者能  
矣進於是則醫王吾且日望吳子之大也勉之哉

地理統宗引

居廬子曰天道遠地道邇故在天成象卽巧歷不可

勝窮在地成形凡有目者可俯而闕有趾者可周而  
歷矣惟聖人爲能察地之理豈其智固與衆庶異邪  
理之爲言合而綜之則文理也分而析之則條理也  
聖人因地事地襲水土而宅幽明夫旣通理於吾心  
由是稽謀於考卜非徒徼福務協地宜自昔堪輿家  
言不少概見堊經而下厥有景純世降而文湍衰視  
素問陰符愈下其後楊氏廖氏代起義非不精如以  
其文則亦虎豹之譌耳挾筴而惟恐臥寧詎有味其  
言乎及夫羣起分門各是其說入云則主出云則奴  
其相距若華夷其排擊若聚訟地道裂矣要之二氏

得其大體百家各守其一隅先民詢於芻蕘惡可舉  
一廢百也頃 縣官卹及慈氏賜地以封不孝所善  
陳山人就而主卜因授是策亦將以示嚮方蓋概舉  
衆說而統其宗師無常而善斯主郡大夫以爲敏版  
之播告域中山人博習多聞事地察矣顧獨往者困  
多岐者亡三人占則從二人衆也武子帥晉則倍者  
八而從三卿無亦善釣從衆衆短從長僞合者易離  
長不足用也則求其真爲愈此輕則彼重真不足恃  
也則反其重爲賢較不掩瑜瑜不掩瑕顧所擇何如  
耳不孝以耳臣目者也惡乎擇之亦惟察之以理主

之以心吾將以是筴爲司契

廣東鄉試錄序

今茲歷在壬午蓋 聖天子十紀元四設科云廣東  
爲南海隩區士喁喁北面以待舉巡按監察御史某  
先期至申要束而綱紀之矻矻乎其豫也翼翼乎其  
嚴也於時藩臬大吏以分部至提調則某某監試則  
某某諸文學以聘至考試則某暨某同考則某某某  
郡有司以檄至程能授事唯其人旣就列御史奉  
詔令而令之三旣授成帥百執事告司盟而申之五  
比日至合提學副使某所選士若干人三試之得雋



七十有五人策名程藝上之 天府故事多士始進  
主司宜必有久要之言籍旣成御史揖某而授簡竊  
聞天地盛德之氣始於東北而盛於東南疇昔聖帝  
明王率由北產帝臣王佐亦以類從薄海而南暨聲  
教而已迄我 太祖中天而興挺生南國嚮明而治  
此其嚮方由是閔儒莊士奮起海濱或參密勿或職  
論思猶之乎鶉首也我 世祖重明麗正首出郢都  
文命先敷光被海宇二三大夫握珠懷寶蔚爲國華  
其言骨鯁其行瑰琦美哉煌煌乎蓋鶉火之次也及  
我 穆考坐銷熒惑海不揚波 皇上在宥萬方文

德四洽多士搏扶搖而上殆將乘海運而天飛有如  
垂天之雲何論朱鳥敦牂之歲盛德在南天澤下濟  
而光明是爲壬午乃今鄉國以三物而賓多士寔應  
昌期夫律天時協地紀本之以帝德類應之以人  
文多士其皆得之殆千古一覲也顧士之自獻必重  
先資主司爲之推轂而戒塗必重先發君子慎始何  
莫不然子之成人父命之冠男之有室父命之婚入  
學親師師命之學夫何命命其始也故三加同祝醮  
同誓鼓篋同呻卽父師無異辭子弟信而從之無改  
慮要以天親則父道尊則師不戒且孚戒可知已主

司以一日之長遇多士於千百什一之中非有父之親師之尊也藉第令有口不越乎質文言行以爲言上士聞而服膺儼若功令此何以故主司之所昭事則奉君事也其所颺言則代天言也臨之以勿貳律之以在三加於父師一等矣某幸爲役疇敢以不佞而廢言今夫士寧質有其文無寧言過其行比年主司之所忠告率術此爲繩墨之言顧茲士以言揚則其文以也卒然命曰所習非所用朝藉手而夕屏之靜言之謂何違何亟也仲尼四敎首事以文其言兩端小大殊矣小言之則莫吾猶人是也大言之則文

在茲是也爾多士擅經術飫道腴該古今盡倫物挾  
筴具在其誰曰不文由是而見之行則得時而駕矣  
上之經緯天地黼黻治功下之廣厲四方斌斌君子  
之士也之文也在坤爲五在乾爲二美中四暢天下  
文明以是爲文文之至也猶未也士之得與於斯文  
也本之吾心文滅其質極於不慙其心亡矣夫坤陰  
德也本諸二之敬義乾陽德也本諸三之乾乾天命  
不已地主有常天地無心此其心也二曜五辰四時  
百物山澤通氣草木蕃蕪雖天地未始廢文文有本  
也多士仰觀俯察宜莫盛於乾坤乾乾敬義以純其

心彌綸之本在是矣幸哉得士若此寧非盛德之王  
於南也與哉夫然則南極列星不爲熒羅浮之山牂  
牁之水不爲麗閎儒莊士骨鯁瑰瑋不爲碩明珠翠  
羽珊瑚木難不爲珍以是而觀人文日幾幾望其熾  
而昌也何可廢邪 上屢詔詔臣工壹以正人心端  
士習爲務心純則正習吉則端誠得若而人相帥而  
潤色帝業 當宁方注目而視拊髀而思逐逐耽耽  
猶懼不旣非惡文也惡其文之敝也然則主司所爲  
口實非述陳言良以廣 詔旨云爾多士受命而虔  
其始視父師有加由是而爲天瑞爲地靈爲譽髦爲

連茹爲四暢爲文明令出惟行主司之言信矣毋將  
曰闡以內爾爲政闡以外爾無預焉是猶旣弁之髦  
旣奠之鴈旣贄之束脩無所用之矣假令法言可距  
謂明詔何彼鵬以鯢化起羊角而下鴻毛何所貴  
之貴嚮往也浸假而浮沉煦沫直將與鯉鮪同科聚  
族而侘之曰海大魚去鯢千里去鵬萬里矣多士生  
斯世也長斯土也其將爲鯢鵬邪鯉鮪邪慎所擇矣  
是舉也云云法得書

### 唐詩類苑序

卓漱父輯唐詩類苑百卷授之梓人余客虎林從諸

君子敦社事於時澂父爲主出是籍以觀坐中自言  
明卿少服儒後經藝而先詩教是籍也窮蒐慎簡更  
二十年願陳刪述之庭以俟論定旣皆卒業藉藉多  
澂父勞一客憮然而疑灑然而目澂父治唐詩者衆  
矣或取節或舉純或區分或類聚或辨體或審音其  
書不啻五車各有所當乃今分類爲苑總總林林古  
人先得我心則類聚之屬也銖權寸度不已銳乎吾  
懼其將爲餽餘吾懼其將爲獵殿蓋其備也余則否  
否澂父其殆不然求詩於唐猶之品穀丞較狩獲口  
不及虛目不及瞬此難以趣辨也澂父起家光祿亦

嘗供恒豆扈上林服采 人主之前獨觀大體此之  
爲博依其深於詩也固當當其方丈畢陳左八珍而  
右六齊馨香滃瀾隨隨所欲而敬進之玉食具矣顧必  
司羞奉羞司醢奉醢割者奉割烹者奉烹各有司存  
而後可待君舉上林延袤千里吞雲夢挾孟諸地廣  
獲多從禽之至樂也顧必樹者樹畜者畜佃者佃漁  
者漁場師漁師羅氏虞氏各效其職由是而擁萬乘  
備三驅乃可以逞曲士拘論惡睹大方直將饜一饜  
掩一隅胡爲乎而廢百也澂父旣反初服芻狗儻來  
方且與化人居業白石壁北面摩詰將受詩禪正宗



則以釋氏之圓通各隨其所入其未入也六根爲桎  
梏四大爲桁楊局局然小矣入之則剗心墮體官止  
神行夫然而音可觀手可眼肘可柳尻可輪五官之  
用可通百體之靈可易無塵不入無刹不融離無所  
離合無所合此其大乘也激父橋足而入意在斯乎  
客謂函翁以禪爲悟門吾黨以詩爲當戶靈均而下  
何必禪哉嗟乎西極聖人默存而化夫夫宜以離合  
爲一條出入爲一貫概諸吾道其孰曰不侔易有之  
觸類而能事畢知此則知道且知激父知禪知詩

二西園集序

君御從玉叔受室館於二酉園其奧室多藏書諸玉叔所稱著具在君御卒業篋而之新都於時白榆社成挾筴而抵不佞吾舅早服重積無慮百千萬言或以時錯綜或以地區別故必齊其體要而後可觀其會通合則千金之裘離則一狐之腋也其或卒然汎應殆非極思衷而定之則惟長者郡大夫故自山陽事玉叔申之以司理之言具楫鳩工以待從事不佞習玉叔蓋三世通家往得玉叔所爲文嘗與元美中分序之矣乃今受命守相其何敢方則自社中召兩生授之部署其一潘之恒職編次其一黃正祖職校

譬不期月告成王叔進閩方伯我國家再造懸寓  
才宜無讓虞周顧惟二三君子代興瞠乎漢兩司馬  
之後幼學則困經術丁年而仕則困程書爰及倦勤  
困於自廢雖有餘力畢謝未遑其志不專則其力不  
競固其所也其間作者無寧躍冶而必爲干將無亦  
歐冶儲精有其質矣要以天地人之助則其淬礪者  
居多世類本諸天名山大川穀諸地麗澤取諸人兼  
此三者故全也夫弓冶箕裘言世業也王叔父憲卿  
而子立甫遞以公車起家作述相承炳焉經世之業  
殆猶殷帝之三寶直之無前媿在武陵則雌雄之匹

也天作之合其在斯乎自昔多材宜莫如楚左史左  
徒而下郢中猶其遺音玉叔生漢陰三湘七澤之靈  
管是矣其稱詩自舞勺始業已有聲年少爲廷中郎  
緩佩而從列棘之後退朝則高談碣石躡足黃金之  
臺太液上林幸一寓目頃之出守不薄淮陽是振四  
瀆而玉百川泱泱乎大觀矣路車覲省登少室歷太  
和周視中原部婁群望蜀之役窮西南之奇漕之役  
登泰山歷鄒嶧弭節京口陟三山觀廣陵濤苦臥黃  
蓬乃在聖室聲出五內猶中蓼莪其杖屨所至則靈  
藪神臯紛紛乎總總乎若動雷雨挾風雲而從之矣

川岳貢珍皆是物也玉叔故多父執居朝益廣交游  
淮海當六傳之衝尤盛賓客其嚴事則若瑯琊鄂渚  
苕雪豫章其石交則若雲杜番禺四明莆田西粵諸  
侯王則若隴西河內縫掖則若潑水華亭山澤則謝  
茂秦沈嘉則俞仲蔚周公瑕俞公臨居淮尤善郭次  
甫蓋傾寓內者什七八取益無方茲更入蜀轉而之  
閩轍跡浸周游道浸廣人無所愛其情矣君御雅言  
舅孳孳追琢不啻發硎日有程月有攷歲有會其或  
有他而廢日僂焉如將不終夫志至則氣從氣至則  
神王直將日暮千古西盡崦嵫玉叔僅及中年則盤

孟之日也卜之日力不亦綽綽乎哉過此與化俱成  
夸父曾不能以步立甫相越發禹穴而校之析若之  
光始升暘谷君御方駕可當羲和玉叔儻然憑熊軾  
歷三天子鄣吾黨當屬兩相君執牛耳矣

汪禹乂集序

有宋五大儒其三則新都之自出都人士壹稟於儒  
術安事聲詩孝武以來北地以稱詩顯由是自邑  
起歛仲房以輕車軼之達甫起海陽禹乂超乘而上  
卽自邑得師北地而鄉人藉藉仲房禹乂出於藍直  
以青賢達甫不佞結髮而釋本業二三君子進之鴈

行於時太師采詩郡中則二三君子爲政仲房幸而  
謂不佞司馬何可無詩不佞則以陳太師猶對士師  
一成而不可變不佞方坐肺石寧遽伏辜假我三十  
年而後剖心聽直未晚也先是里耳相屬業已播之  
郡中而禹又陰納不佞之言從約浸解其後三十年  
所不佞一呾無聞兩君子之集遞成懸書國門有日  
矣禹又三執業而就不佞乃今願定吾詩要以平生  
之言不佞甚慙於禹又元美以負俗多禹又嚶嚶然  
少吾鄉其後語潘生新都有詩自司馬始不佞拊耳  
而走何敢與聞城陽仙也而詩紫陽儒也而詩何無

詩也藉令一當元美遠之必風雅必江潭必河梁必  
鄴下必李必杜必開元近之必濟南必北地而後稱  
良則自風雅以及開元大江以南董董耳元美崛起  
庶幾乎千古一人不佞一呖之未遑其何以張吾郡  
要之有禹又在足當前茅其於九歌二雅六義五音無  
所不闕其於屈宋蘇李韋枚曹劉王謝盛唐諸家無所  
不入其於音節景響意象風神倡和轉移押闔飛動  
無所不得其於樂府古風長句近體無所不工卒業  
縱觀亦旣閎矣麗矣祿大矣渢渢矣泱泱矣然而不  
守一隅不由一徑或得之心或遇之目或觸之興或



動之情調調刁刁衆竅畢作猶之大塊噫氣吹萬不  
同斯固禹乂之優爲亦且千金享之矣舉世東鄉元  
美而獨不足於仲房斯則不佞不敢知其尚爲鄉人  
嚆矢也異日者胥命漸江之上直將索其集而觀焉  
元美衡石古今獨目新都而屬不佞不佞非能詩也  
庶幾乎可與言詩也與哉

梅花閣集小序

公遠偶偶絕俗則負里市爲園園有樹梅崇五仞而  
羨據岡之脊爲閣其南枝入垣而掠牖西華者什三  
偃蹇若垂天翼閣下一章華者什一矯翼而仰視若

鳳將雛東牖一當步櫺脩減于雛華者什九往予期  
公遠卽梅發則速客宿閣中公遠請脩成言兼速二  
仲會蘇君昭載酒過予里予強君昭與俱旣又期潘  
景升方嗣宗兩生方急顯者卒不至予首登閣四顧  
而樂之冬日如春環豐樂水之陽皆可寓目下閣則  
踰垣而入爲西園面積水爲水月津梁緣隄而登彼  
岸一章橫東廡爲玉蝶梅標枝作兩三花英英如也  
栩栩如也由白蓮社而就館得絳梅一若江妃立水  
濱館臨水有臺二堵皆鑿坏如望月二章對峙左紅  
右白皆出月中臺上一桂冬榮如良史作繪事近水

樓一章如東廡花浸煩公遠館客而飯中臺日三舍  
耳客告飽而徙倚臺上遠視維舟在隄隄上士女踏  
歌入舟奏五湖之曲於是榜人揚楫且泳且歌日旣  
崦嵫猶及辨色舞衣隱見若有若亡歌隨于唱若抗  
若墜舟汰曲梁入迴塘若遠若近迴翔曲折若驚鴻  
若游龍予曰觀於臺游於沼孰賢二仲對曰游其蛸  
乎觀其蛸乎蛸則爲方內觀蛸則爲方外游也日入  
而夕篝燈熒熒出招提考鼓撞鐘則以供大士東岡  
招提鍾鼓如嚮者則以供文昌予曰閣夜寥寥孰爲  
太一乃相與更登閣晝所寓目者悉入亡何有之鄉

三華鼎足而立三隅若侍吾夕時月載魄乃自牖秉  
燭以代明標枝倒景負牆猶帶月也冷風不至燭光  
亘天優耦進而歌落梅無論比竹遙浮大白風凜凜  
其不可畱下而仰觀燭三跋而夜未艾烟霏霏如積  
氣殆探瀛海而出蓬萊予曰噫嘻游乎其上觀乎其  
下孰賢二仲對曰上則房皇下則宮牆游者觀其深  
觀者游於其藩而已予曰固也君子取適惟得當於  
吾心善游觀者無物非我無我非人無內外無高下  
皆適矣其斯爲采真游其斯爲通物觀也夜分各就  
寢予就枕上志之

7  
スズニミ  
二二

太函集卷之二十三

太函集卷之二十四

新都汪道昆伯玉著

序十二首

騷選序

太函氏曰風雅變而爲騷江潭尚矣其徒二三速肖  
其下波流騷變而爲選郊蘇李而禘張衡柏梁梁父  
祧矣漢其室事也魏其堂事也晉猶在祚餘悉在祊  
故波流無騷非無騷也善哭者無情而不哀騷之優  
孟也繹祊無選非無選也雕幾工而太樸喪選之枯  
樵也以騷則逸爲政以選則統爲政又惡乎取之或

類有同方或體有各至藉令必要其極寧詎能舉一而廢百邪許由有言有族有祖聚族則由後率祖則由前比而合之選其族也騷其祖也由前則推而進爲六義爲四詩由後則放而文爲貞觀爲開元爲大曆二氏迄今誦之勿絕其斯一當衡石也與哉始予合騷選版之襄陽直將杓之百家之前而衍之三百篇之後歷二十年所版畱郡中乃今學士置古昔若天池浸淫乎洞酌以爲爽予庚授之剗厠門人鄭生職之工告成生乃問序郡版故未有序道古者殆難爲言其能爲逸也者統也者不越乎一家之言其不

爲逸也者統也者庶幾乎先得我心矣

姜太史文集序

今少司寇姜公始舉於鄉不佞蓋從公後公入中秘書以太史起家晚者陰排之遂補按察僉事出視蜀學稍遷河南叅議進副使視學八閩旣遷太僕少卿轉右通政有頃出爲南大司成其後晚者復中之乃免近起太常遷南少司寇而公集始布於新都蓋直指張使君屬祁門張令君授之梓人皆公閩蜀高弟集凡二十七卷蓋初藁一卷中秘藁一卷讀禮藁一卷史館藁二卷西川藁二卷周南藁二卷閩藁二卷



南雍彙二卷家居彙十一卷竢將來者續之梓成則  
令君將使君命序余惟國初二三宿學並列著作  
之庭顧其體猶沿當時難與道古弘嘉之際作者烝  
烝秦齊代興壹稟左氏司馬由是糠粃有宋胡相因  
於陳陳毘陵晉江始亦操其末議中道改轅趣近毋  
勤遠略而亡功于是尸廬陵而祝南豐文在茲矣第  
奉歐曾者紉秦漢奉秦漢者紉歐曾雖不佞亦僅守  
一隅直爲朦腐二史左袒公守毘陵師說師古無若  
師心其言曰語有之貌言華也至言實也夫心爲實  
心學爲實學言爲實言用爲實用文斯其至惡用求

工莊生有言道隱于小成言隱於浮華工無益矣先是公入蜀不佞守襄陽中野相與班荆日下春而別公語不佞伯玉固多能哉語性命則性命語經濟則經濟語辭章則辭章辨矣博學而無所成名孔子之所以爲大並舉不朽而參相立惟聖者能吾黨三而一有焉務求其至亦足以立詎必多學爲哉及入閩同官幸得相與朝夕睹公所論著處其實不處其華直將以大冶而鑄歐曾應響毘陵不視而速肖者也其後二十年所始得覩集之大成其間論道者什三經世者什七卽屬辭汎應非近斯二者不談要皆根

於實心典於實學含章時發則爲實言寧爲清廟明  
堂母爲棘端櫟葉何以故貴其實用故也夫文由心  
生心以神用以文役心則神牯以心役文則神行牯  
其心以役於文則棘端櫟葉者之爲吾懼其無實用  
矣抑公之實用非直以其文嘗觀其在蜀在閩在成  
均功令不煩而多士顧化藉令究其所爲大用者又  
焉往而不宜如將以是集觀公猥云至矣非其至者  
也其緒餘也雖然此有由本也毘陵故爲華亭所推  
轂而分宜預有力焉及其善用分宜智矣圓矣公受  
毘陵家法固當矧方爲圓胡爲乎一失之分宜再失

之新鄭巧拙異矣惡在其青於藍竊惟圓而神天道也故不可窺直以方地道也故不習而無不利美在其中而暢於四支發於事業語文之至者其惟至靜而德方故謂毘陵得妙用則吾黨有胥無心者不敢與知謂公得其實用則吾無間矣

### 書經會解序

自吾道之南也則閩用經術先鳴我二祖以文治興屏諸科而壹稟於經術於時布學官絜功令屏諸訓詁而壹稟於閩古之爲經者十有三義軒虞夏殷周迄於鄒魯釐而爲五綜而爲四閩自文公故其六

七三家者相率而故其二三言人人殊大氏皆閩產也乃今學士嚆矢率用鄒魯之言要以誦法鄒魯羽翼考亭則泉先正爲盛當世近取勦說經藝盛而經義衰由是而任口耳黜心思波流愈下從而詰其指要其孰能不啗猥云窮經無當於用固其所也夫經一也致用莫善於書二帝三王治天下之大經大法於是乎載乃今儒臣日陳講幄聖主終始典之則百世之善經也蔡氏受面命於文公從而爲之故歷十年而始卒業不亦斤斤乎哉顧自三墳亡八卦隱尚書出涵萬始而涌三光高者入鴻濛深者窮要

眇聲牙者矐口木舌者距心槩於諸經難爲故矣非  
故之難也疏通知遠之難也我 太祖不登蔡氏

成祖乃卒躋之寧肉而玉母好而璿蔡氏則其珞珞  
者也昔之典書者閩爲政此有由本與巡察張公起  
家泉州蓋以尚書顯故嘗舉其家學而觀其會通刪  
述凡若干篇爲卷者六命曰會解首陳蔡傳撮其要  
而芟其繁折衷衆言出之自得因經以求其故因故  
以研其精近之然文公之所同然發蔡氏之所未發  
遠之揖讓乎九官之上周旋乎三代之英非直同聲  
而且同氣非直同氣而且同心千古與稽旦暮遇之

矣夫粵之鑄燕之函夫人能爲之至於工師其力千  
畝而不鄰其壽百年而不齟良之良者也必求其所  
以良工師且不能自喻何以故其攻也專其服也習  
其得之心而應之手也神他工豈其無良族矣往姜  
太史督閩學面不佞首稱泉州旣試諸生則巡察公  
首舉其年甲子遂與計偕及吾兩人得謝而南公以  
御史出按部御史卽有周柱下史也寔主藏書監司  
周使君亦以書發家得公所著則以示六郡守相不  
佞故嘗以書授諸弟子乃從高大夫得觀部中竊旨  
其言察若離朱精若巧歷探若淵海辨若瀧溜相應

若率然相先後若祝敵藉第令一屈首庶幾躋古昔  
覲先王何鑿鑿也公在御史嘗上書諫佚遊 上納  
之趣旋駕其在行部夷淵藪以弭流言卽窮而無告  
欲盡其辭皆得專達有所撻發罪止渠魁凡諸張弛  
緩急無一不軌於正經此以粵鑄倍入燕函先登致  
用莫利於此矣由是而班六官踐三事爲師師爲斷  
斷寧詎非書教乎漢鼂錯黃霸並以治書聞及其持  
國秉爵通侯勲業爛然爭烈責之以疏通知遠圖惟  
厥終則皆未遑此其凡也故明經莫如宋宋莫如閩  
乃今則推轂泉州公由此起其斯爲大用也與哉昔



人有言建首善自京師始 上命巡察以南國固當  
高大夫述不佞之言將以告都人士遂列諸首簡海  
陽丁令梓而布之

沈純父行成稿序

沈純父官尚書郎以直言戍神電先是寇入神電創  
者未夷則置純父行間蓋嚴譴也純父故爲番禺令  
神電密邇番禺故諸生負策從之游講業如故或謂  
君侯以卓異表 當宁卒不拜臺省郎故執政喪父  
而不喪有言責者迄無卽主君侯攘袂而起舍三尺  
而代之何居純父謝曰比黨者遂其姦怙終者義其

罪忝睢渙忍舉國若狂如必當言責而後言殆將絕  
天之經裂人之紀吾黨之罪也 上薄臣罰則以尺  
籍當丹書今茲猶得與諸君子游是天幸逐臣而紓  
之罪罟也純父享堯鑒若文冕在行伍若終身居  
七年江陵敗悉赦諸言事者還田里復其官純父歸  
寧諸賓客故人郊勞握手相語始江陵以人勝純父  
純父卒以天勝江陵昔也怨乎今則喜矣純父拊身  
而對曰走爲臣子無狀上逢 主怒下遺親憂顧猶  
得追缺鉞之誅臣何敢怨乃今幸得及于寬政親心  
以寧寔惟 宗廟社稷之靈又何敢喜有頃純父進

光祿少卿余入吳純父逆余就李邵長孺挾策至則  
出純父詩觀余且曰純父急公亦猶公之急純父也  
純父故有入粵稿吳明卿序之被徵稿徐子與序之  
是稿得之海南公序矣余避席曰是役也異乎兩君  
子之撰余則安能夫乾以直而生坤以直而利枉之  
生也是謂非夫顧直道難容枉道易合自龍逢以來  
未之改也彼事君人者不妾婦則皇尸一以比之  
以緘默品俱下矣外直者獨抗高論一鳴驚人第  
令爲名高則猶有所主要以與古爲徒其未也內直  
者惟徇國爲矯矯亦惟徇義爲皇皇儼然成心未忘

直而自有要以與天爲徒猶未也乾勸直而悔在亢  
坤主直而章在含楚之離騷是爲詞賦之祖則其骨  
鯁千古一人其間感憤不平不無少望借曰怨而不  
怒吾知其爲亢不爲含直道事人焉往不黜聖之和  
也純父行吟海畔感於靈均夷考其詞夫復何怨正  
直壹歸於忠厚有而不居品之上也余聞純父始通  
籍以請告歸比還選格當領縣會新鄭公攝太宰目  
偉純父將德之介張卿與之言吾安能弃偉丈夫出  
居縣第姑入郎署尋以臺諫遷焉他日申嚮者言面  
語純父純父聲折而退曰思孝格當得縣何敢藉寵

靈而廢格乎願受一縣務孳孳得境內和直以此答  
知遇耳比至縣所部自開府以下令有扞格輒力持  
其不然至其特立敢言則古之遺直不啻也及余始  
與純父遇望之儼然溫不勝栗進而卽之則廓然其  
無垠也淵然其無量也栗不勝溫與之言則栗而寬  
溫而直時而侃侃時而闇闇其殆含而不亢者邪庶  
幾乎參和矣純父於粵善黎惟敬歐楨伯若明卿於  
燕善王敬美若子與嫻于詩教則其緒餘其發言也  
本之溫厚和平蓋深於詩者也可邇可遠可怨可羣  
純父將以是爲教父

潘象安詩序

自唐失律而詩亡歷五百年而始振國初猶昧旦也具曰入室主奧之謂何什一由庭什九由徑卽擇地而履其孰能不頗海內自李獻吉出而後風雅可興新都自程自邑受獻吉詩而後徽音可嗣自邑釋七策而操六義此難與宿學並驅要以不徑而庭步不愆矣其後王仲房由諸生起力求多於杜陵彼直以獻吉爲杜陵優彼直以自邑爲獻吉吠也江處士爲之衡石亦旣尸自邑而蛻仲房方中丞有味乎其言蓋一倡而三歎矣仲房尸祀王孟皆竄百家三人

者枹鼓同聲莫不嚮應潘象安由王孟進得此而喜  
可知象安年十三而稱詩故其才雋旣薄諸生屏經  
藝故其用力益專三人者交譽象安名隱隱起會淮  
南李公執政開東閣以延象安始聞象安詩業已傾  
耳旣習象安質行灑然傾心下之遂徧贊之公卿大  
夫象安天下士也諸公卿大夫咸造相舍就見象安  
則以其人溫厚爾雅如其詩君子也寧執一經以待  
舉無寧以堅白終督學使者檄內史部中辟象安屬  
州博士象安感然疾首視側注若堯鑒安得赤帝子  
溺儒冠吾首適矣久之卒疏博士業稱詩如初初象

安客相門歷有年所非賓至不輟業卽一至非古昔  
不談由是質舊聞程軌物操獨見任折衷古體則取  
材於昭明長句則希唐調近體則杜陵爲政王孟參  
之大都以風骨殊非直取節而已古者詩在閭巷當  
世率以反舌而詆布衣如得象安一鳴則希有鳥也  
吾郡以布衣著者三得象安而四當世以布衣雄者  
二得象安而三彼自邑能得師獻吉而不能盡其才  
仲房能負俗而抗杜陵而不能竟其力之所至處士  
能辨象安於暘谷而不能自必於虞淵象安之負培  
風後發先至有餘力矣且也西秦東齊白二更霸太



初操秦聲而擊缶亦其偏長顧其人足爲名高卽便  
蹇亡論已茂秦之歌齊右壹稟於高唐不譽者有煩  
言其人非矣不佞將爲布衣建鳴鼓則裒象安詩若  
千卷成一家言夫以言舉人則其言重以人廢言則  
其人輕要之是集之所取重者則其言也象安之所  
取重者則其人也人與言交相重矣故其人不朽而  
言傳方中丞嘗評王孟詩一如雪山佛子一如石室  
道人信矣顧輞川以媒自媒襄陽以往自廢釣之人  
喪言矣高潔者固如是邪象安徐徐于于宿直廬如  
臥草莽高門下士必三招而後行是之謂質有其文

知人則知言矣

少室山房續藁序

元瑞籍詩三百篇則元美序矣概以當世二三作者  
瑜不掩瑕由前則推于鱗由後則推元瑞申之耳日  
無兩要以代興元美自信平生之言於人無譽及其  
脩元瑞也務入沈深出自然期於質有其文追風雅  
而薄漢魏元瑞唯唯遂輟經藝罷計偕時而臥遊櫬  
百家獵千古稱詩視故筵等抵孤序之初學士盟葵  
丘而主于鱗卽元美爭自下孤獨高于鱗而大元美  
心竊竊未敢言于鱗集旣行元美屬孤爲之序孤時

竢論定卒謝未遑頃之弇州四部稿成孤始吐私臆不敢終隱元瑞起屢而從歷下放於瑯琊卒尸元美而祝之以于鱗配且言大成之尊柱下亦猶元美之右于鱗瀛海稽天吞岱宗者不啻三五不茹而吐其斯爲有容夫以於越少年直將排泰山躡梁父何嚶嚶也齊吳更霸魯幸與盟元瑞業已求多於一匡魯於何有且也元美藉藉元瑞孤無庸贊一辭其進元瑞者兩端其言具在元瑞挾筴固請善言必三竊惟言志爲詩言心聲也吾道卓爾惟潛心者得之元瑞直以稽古而廢明經尸居而絕戶屢坐忘而冥合官

止而神行其心潛矣潛則沈深自然之所繇出也元  
瑞益矣其曰利鋒藏巧露其質木此於元瑞何難揆  
之天時必時至而後可蓋天有至教各以時行不春  
不華不秋不實時有必至天且不違元瑞蚤歲之業  
則春也吾見其鉅麗吾見其日新及其壯也春而夏  
矣吾見其蕃滋吾見其峻茂過此以往於時而秋秋  
實告成堅矣碩矣改柯易葉無用芬華歲功畢矣藉  
令如馳且盡惡可凌節乎哉元瑞待之無所容爾力  
矣

黃全之小集引

往余有事闔海從逢掖而得黃生蕭城破生亡其家  
戚少保辟生領記室少保召入彊生與俱生謝曰  
頃奉夫子命曳長裾客轅門則父母之國以也大將  
軍北矣僕不能從及余奉特遣行邊生謁余塞上  
余將薦生教授武學生力辭始夫子命天全罷博士  
家言專力脩古以希不朽乃今犬馬之齒及矣安能  
畢棄疇昔而事陰符旣歸莆則從二三耆舊相倡和  
集者多故軒冕生布衣韋帶儼然以齒先之於時競  
近體務纖趣以媚當時生獨攻古五言一倡三歎其  
有不合則仰天而呼嗚嗚鄉人或以爲狂或以爲諱

久之或以爲真而率或以爲諒直而近士風居數年  
同社亡者過半矣余旣家食生自莆三入新都其後  
至則余及耆奉黃石履爲余壽將別挾筴進曰天全  
周甲子者踰七年歸且從此老矣中年將賈餘勇庶  
幾與中駟並驅日月坐馳訖於白首惟茲劍首一吷  
誠自知不比於音願乞一言杓之下里夫詩樂之始  
也余嘗審樂以觀詩爲燕也石爲巴也瑟爲牙也琴  
直以一音取重卒之舞百獸和神人出流魚仰秣馬  
莫不入神藉第令廣樂畢陳不加於此矣故蘇李之  
五言張衡之七言終不以少而貶美如其不可與道

古雖多何爲少保以下士聞多慕羶者全之中道而謝少保不亦矚然乎哉武學視博士爲賢再命足當十萬戶全之躡而脫之也庶幾彭澤之徒與由躬行以概其稱詩可與道古者也全之有子丞贛榆亦出余門下得余言而溢喜遂梓全之詩於邑中

### 詩紀序

北海馮汝言旣輯歷代詩紀版之關中坐踣遠而購之難且病校者疏而梓者拙也吳琯自新都起拓什二以張東秦身帥吳兪策歛謝陞江都陸弼分校之名吳工敦剗剗旣告成事莫不精良則王元美序之

矣顧貞觀而下未及也誓將求全屬黃河水首事而  
湓亡僅得十有四卷琯手自爲集屬二三子校刻如  
初論其世以爲差悉如高棟所品初則正始盛則正  
宗大家名家羽翼爲中接武以下爲晚於時李本寧  
方子及爲之序是則唐詩紀云二者將訖工乃質成  
於不佞不佞故溺脩古雅言稱詩與屬辭通大率祖  
三百篇宗楚騷漢魏而祧六代卽盛唐具在祊繹與  
主杜陵顧惟道古爲洋洋不樂近體持論歷十年所  
居之不疑諒直者不然其言謬謬而脩不佞四序推  
斥天道則然夏則副瓜冬則椒酒寒則狐白當暑則



絺夫夫恃瓜葛而將輟寒時宜何有不佞始改慮而  
求唐體止於大曆以前乃知猗韋不能不波寧詎能  
舉一而廢百旣卒業詩紀夫然後睹詩之全吳生輪  
獨力而舉羸其有功於詩教何可勝紀夫天建北辰  
以爲極三垣列宿經之七政緯之觀象明時於是乎  
在而恒星萬二千五百可仰而闕不則含舉不名而  
宣夜有遺視矣堪輿氏司地習形家言極其致則方  
里可布闕庭而堂坊直一抔土耳然必相方隅察源  
委明嚮背審剛柔周覽窮探而後可從圭測不則舉  
一毛而失馬體將獻笑於大方故大海稽天三山始

壯周廬環列黃屋始尊何以故得全故也要自九歌  
二雅延及齊梁惡可同器自開元迄于季世惡可同  
牢彼其耳食而務屬厭焉知正味藉令入大官而爲  
之宰吾其從割烹者品嘗之六藝若在尸饗日用不  
廢楚騷則朝踐漢魏則常珍齊梁其餘閣與吾將虛  
口矣初唐則醴醖盛唐則棗醞中則醕晚則昔方丈  
不取盈於一臠九儉不取足於特豚皆是物也是紀  
也代必盡人人必盡業殆將窮宇宙歷歲時周視尚  
方惟口所適具矣備矣全體賅矣宋無詩無取也詩  
之善物庶無遺力矣乎雖然羣飲江河不過充腹雖

有敏者時能不雲夢而引明河挹彼注茲由博反約  
深於詩者也志之所至詩亦至焉猥云刪後無詩則  
是歷年三千天無章而地無紀矣不佞衰矣寧復能  
從小子學詩願及崦嵫末光操詩紀以從事擇其可  
爲典要者表而出之孰近於風則曰緒風孰近於雅  
則曰緒雅孰近於頌則曰緒頌如其無當六義而美  
愛可傳者亦所不廢則曰緒餘降及輓近二代不可  
謂虛無人當世斌斌八音萬舞具矣假之朞月庶幾  
成一家言要之啓疆略地吳生任其勞據上腴而食  
其毛不佞蓋享其佚矣諺曰跣則鹿舄則肉吾將負

吳生哉

弘明集序

梁釋僧祐輯弘明集十四卷蓋由東漢以迄當時凡諸論著足以弘道明教羽翼法門者悉入焉總之則閎儒什七開士什三斌斌具在唐釋道宣廣之爲三十卷蓋由鄭圃以迄當時凡諸論著有當於弘明者裒而什之區別爲類始則歸正終則統歸儒釋程能亦如嚮者二集並入大藏如海一漚康虞杯而出之易楚筴爲儒筴庶幾乎薄海內外亡不流通亦普門灋也大道函三爲一中古裂一爲三同出殊塗務伐

異而守勝甚者互相排擊不啻華戎竊惟大同以及  
小康均之無爲而治老氏亦猶行古之道也豈操戶  
說爲哉周公仲尼惟制作刪述爲汲汲儒者迄今爲  
政顧乃尊龍德而薄猶龍爰及漢明釋教始入中國  
西極之化未之前聞重以言語不通謠俗不易羣吠  
所怪鮮不狎狎久之則譯其言其言可繹格其俗其  
俗可因於時學士大夫比丘弟子羣然倡和有若于  
喁彼或薄以先聲亦且建鳴鼓當之矣及夫初祖旣  
東言筌畢廢六祖南矣登最上乘故其教入梁滋昌  
躋唐滋大梁則僧祐唐則道宣雲作風行會逢其適

是二集之所由輯也其後昌黎直諫方之禹功宋儒  
擯斥異端傳諸戎首猥云以道自任耳視者愈益耽  
耽彼日而升此月而恒成虧不相及矣我二祖在  
宥而理參兩成能六籍三乘相爲經緯真儒崛起  
屢不二之門宗廟百官惟所寓目粹然而辟閤者直  
以爲吾廬此滅虢之圖第保聲名無缺耳有唐祖玄  
元而稱帝其教益張釋氏紛紛執言嚴於詬厲然則  
後世之絀釋氏豈惟儒者褊心乎慨自白馬入都始  
或以侏僂逆耳譯者以意逆志未必皆得其心彼豈  
不聰難以求備二集所載則皆斐然成章論其世而

稽其人其較著者可僂指也儒則漢桓譚牟融晉孫  
綽桓溫郗超習鑿齒宋宗炳何承天顏延之謝靈運  
羅含孫盛齊明僧紹張融周顒孔稚圭北魏魏收北  
齊盧思道顏之推梁蕭統劉勰沈約江淹江總王僧  
孺徐陵隋李德林薛道衡唐褚亮裴子野釋則晉慧  
遠支遁梁法雲隋智者唐玄奘是皆深沉博雅精義  
弘詞披瑕握瑜亦有足術昭明文選簡棲之外無稱  
焉誠懼一傳衆昧莫爲適主寧爲絕物無寧自絕於  
儒要以嬰兒未孩其嘔如一傳楚則楚傳齊則齊作  
者竝立莊嶽之間壹宣於正彼其習心不察猶然以

爲鵠舌也者而非之諄矣且也冀州之墅三聖出焉  
大江以南率隸蠻服概諸古昔大有徑庭乃今吳越  
江海之陬遞以人文甲天下太行迤北僅當一隅藉  
令尊古而卑今是秦亡復陶而吳廢縞帶諄之諄者  
也二釋所輯具有羽翼功幸得康虞爲之臚傳將令  
咻者批頰退矣夫道家率由上古於時爲春於樂爲  
蕢桴於文爲鳥跡彼一時也儒者自中古起家於時  
爲夏於樂爲韶舞於文爲鍾王此一時也釋氏先發  
後至於時爲秋之成於樂爲鈞天於文爲籀又一時  
也康虞之爲是舉也殆將通百世秩三時律八風銘



九鼎異非岐異同非雷同昭然發牆面之蒙解兩家  
之難卽有喙三尺寧詎能黜鄒魯而夷之邪雖然少  
林曹溪默存而已弘無所弘斯至道也明無所明斯  
至教也二釋同時而出寧復背馳射者取節騶虞此  
直爲之嚆矢由斯決拾而進不失嚮方康虞得師達  
觀抑或可與語此是集固將流通無間惡用不佞之  
言

二經注序

默然無言廓然無聖尚安事經儒家以故而故六經  
于今爲蔓佛經以華譯梵將無燕郢乎哉學無得而

求之經經無得而求之故彼亦一文殊也此亦一文殊也猶之擢髮而櫛一握謂何金剛經心經並載般若具法眼者表而出之卽言非言卽聖非聖夫是之謂不二法夫是之謂最上乘故者無慮數十百家其蔓滋甚居士之爲是故也將芟刈而一洗之折衷衆言獨觀昭曠不任耳不刳心離無所離著無所著故之善經也嘗遵南海一息寓是筵於太函宰官太一子旨其言亟屬梓人播諸東土吾儒直以六經爲注脚釋亦宜然彼其求之經者非求之故者益非居士以非去非將安取是吾儕有當其要眇爲之張皇非

之非者也雖然土直糠粃至道無擇非因於是是緣於非吾之所謂非者庸詎知其真非耶庸詎知其非非耶吾將以是而問諸觀自在吾將以是而問諸須菩提吾將以是而問諸佛

### 止止堂集序

司馬將將而辨官材材則人人殊矣余獨持論當世不患無全材而患無真材文武具足之謂全討平戰克則其真也概諸華實之辨與其全也寧真真者未必全猶足賴也猥云得全而失真矣奚賴邪余則以余未始有知虛已而稽於衆其一將浙將閩島夷辟

易而名之曰虎其三將百粵將三吳將淮海所部推  
轂而名之曰儒真者一而全者三材何可勝用也余  
故耽耽而視其殆不然夫以封京觀斥邊庭矯矯虎  
臣少保是已彼三良者胡然而儒夫已氏嘆喑高譚  
大而無當夫夫舉肥者二直將登之結繩之前以是  
命儒狙而儒冠者也少保由諸生起當戶褻然以經  
術鳴禮樂詩書故所服習時而緩帶孳孳挾策操觚  
三命專征師中蓄草盈篋余間得其什一約言如鏃  
脩言如矛雅言少保炳炳虎文真儒者事彼哉狸德  
儒然乎哉顧交譽者不名儒直以武功揜耳猶之海

岱爲政孟諸梁父無稱揜之也少保旣釋戎事束書而抵太函蓋悉索舊賦以授梓人有成籍矣余卒業而太息竊多少保之材之全則其武功吾見其閑節制中機宜猶之乎左氏之謹嚴文足經也則其文事吾見其清明在中志氣溢發獨觀昭曠冥合章程猶之乎衛尉分部而翔驃姚不緣法而勝超忽滅沒不失馳驅武足緯也其始計也吾任吾真而已非直爲名高也者而求全持之久則真者純出之純則全者美矣得將如此惡在其不儒諸儒居幕下者若而人齊濟良士浸假而授之簡或不能贊一辭降材非

殊其由中者異也古昔以全材著者宜莫如三代之  
英禹之謨伊之訓周之易魯之春秋作者五人皆吾  
所誦法其後則出師二表洋洋乎有莘氏之風蓋壹  
稟之鞠躬盡瘁之心成敗勿恤卽孫武穰苴之所論  
著曷以尚茲是謂才全三代以下一人耳竊惟兩國  
師武臣力豈不桓桓脫令少保當之亦皆勦敵於時  
魏受巾幘吳受盟言凡諸帷幄之臣熊羆之士爭避  
三舍武侯尚矣宜得擅場卒之鼎足三分而顛趾則  
自漢始少保南平閩粵北誅匈奴制勝萬全所向無  
敵畏之如虎先後一揆要之武侯不以偏安而貶全

材少保亦不以庸公取大本之匪躬蹇蹇皆所謂不  
二心之臣少保能自得師則丈人之長子也儒者之  
言不朽其次立功立言彼冒儒名惡睹功見言信少  
保兼此而足術斯其不朽也與哉少保引身謝曰繼  
光服三尺以勤四方誠不勝狗馬病司馬括我以不  
二鵠我以全真繼光不材敬奉嚆矢以往

玉峴集序

蓋自 上親萬幾給事中恒叔以言取重其負直若  
楛矢其持重若省括而釋中黃中窾若奏桑林而解  
大輒其用壯若命脩蛇之神迸太行而徙王屋旣而

得請歸臥玉峴之陽官守捐矣言責釋矣庶及閒暇  
周旋著作之庭直將成一家言以參不朽越在草土  
始廢脩辭乃今旣祥玉峴爲政其所就業益斌斌矣  
先是恒叔令朗陵有朗陵集入燕市有燕市集弇州  
而下莫不歌之誦之膾炙之嚆矢之至是則由往者  
以迄今茲合而成籍命曰玉峴則壺丘畏壘也與哉  
恒叔辱在新都余受而卒業故嘗以謬謬多恒叔乃  
今幸得而睹其全蓋時而鳳鳴則非簫韶不儀非岐  
山不至時而龍德則蟄九淵而翔九天當其特立敢  
言三事欽衽彌縫主闕繩墨官邪矯矯乎骨鯁之臣



矣其始受民社日治程書不遑退食自公授簡四座  
抑或稅冠解佩散髮扁舟直以令舍爲梁園以洿池  
爲濠濮比及三歲業已質成因而憑軾中原睥睨二  
室登高弔古僊僊乎天游比入掖垣休沐都市悲歌  
慷慨左荆卿而右漸離至其賦易水以壯逐臣庶幾  
乎可以羣可以怨矣一旦告歸子舍睨千古而眄八  
荒顧獨睢盱自如淵潛而不可擾緒餘所出僅僅若  
于言雲則垂天雨則穰歲雖有敏者曾莫測其所嚮  
方此其六月息也夫趾者麟羽者鳳兩者皆希有也  
顧靈而不神要以詘則尺蠖信則亘天其斯以爲神

龍其斯王四靈而爲之首也恒叔退然自下屬余從  
弁州而定其文余聞才勝者用才法勝者尚法或以  
才掩法或以法掩才才羸而法詘則不羈才詘而法  
羸則不振不振則終靡靡耳不羈者猶或可以範馳  
驅此長短大小之辨也恒叔以彼其才其才不可勝  
用求之於注母爲是拘拘也其變不可勝窮才之所  
至法亦至焉則其能事過此以往未之或知西極至  
人亦嘗面授之矣有辨才卽非辨才是名辨才有佛  
法卽非佛法是名佛法異日而登彼岸其斯爲龍樹  
矣乎

太函集

卷之二十四

七

太函集卷之二十四